


# 佛道教三經解 **戦要題**




# 佛遺教經解



# 佛遺教經解科判及目錄





### 佛遺教經解

明古吳蕅益釋智旭述

歸命常住大悲尊

爲順初機重解釋應病與藥權實法

亦禮天親造論主

述曰:天親菩薩,以七分建立所修行法,釋此經義。推徵精密,開誘殷勤,萬古以

久住。滅除凡聖過,成就自他利。」噫!此經奧旨,菩薩誠盡之矣!

無能更贊一辭。觀其言曰:「爲彼諸菩薩,令知方便道。

以知彼道故,

佛法得

下,

末世鈍根,讀菩薩論,或解或不解,或昧或明,雖有源師節要、宏師補註,仍亦攝

機未編。今不揣庸愚 ,輒復爲解。庶幾下里巴人,易爲賡和而已。

將 釋此經,大分爲二:初題目,二入文。 初中二:初正釋題 ,二出譯

人。 今初

佛遺教經解

-

#### 佛遺教經

「佛遺教」三字,是別名。「經」之一字,是通名。就別名中,佛爲能說之人,遺

教爲所說之法。人法雙標,能所並舉也。

名爲始覺;旣從夢醒,惟一覺心,更無二心,名究竟覺。 無不究竟,故名爲佛。又在夢之心,心不可滅,名爲本覺;從夢初醒,知夢本空, 佛翻爲覺 。衆生長劫在夢;佛斷無明,如從夢覺。旣自覺已,又能覺他,覺一切法

言入滅,令生悲戀。又以大悲無盡,曠濟無邊,故雖示滅,仍留遺敎,接引後昆。 天,水清影現,水濁影亡。是故佛實常住,未嘗滅度,特爲我等一輩濁惡凡夫,唱 道,爲我等師。又因我等長迷不覺,故於無生無滅性中,示有生滅。譬如月輪在 此之覺性,含靈本具,無始無終。釋迦牟尼,不過先得我等之所同然,所以示成佛

之,則是法子;不依所囑,則是大逆不孝者矣。

「遺」者,貽留。「敎」者,訓誡

「經」者,訓法、訓常,具如餘處廣釋。

逆にを含む。猶儒書所稱顧命,亦人世所謂遺囑也。依而行

### 亦名佛垂涅槃略説教誡經

「垂」者,將入未入之時。

「湼槃」者,離過絕非,不生不滅之義。而有四種:

、自性清淨湼槃。即一切諸法本來常寂滅相,佛與衆生平等無二,不增不減。此

則不論出入。

二、有餘依湼槃。謂三乘已斷見思子縛,而所依果縛,身心尙在。此約證果時入。

三、無餘依湼槃。謂三乘灰身泯智,復歸無名無物本體。今正約此論垂入也

四、 無住湼槃 0 謂諸佛菩薩,有智慧故,不住生死;有慈悲故,不住湼槃。不住生

死,故能非滅示滅;不住湼槃,故能非生示生。

佛久證此無住湼槃,今爲有緣度盡,故示垂入無餘湼槃,實不同二乘之一滅永滅

也。又湼槃有三義·

一、性淨湼槃,即法身理體。此則無出無入。

圓淨湼槃,即般若。斷惑究竟,冥合性眞。此則一入永入。

三、方便淨湼槃,即解脫。方便示現,起諸應化。此則數出數入。

若以三義對上四種者:性淨 ,即自性清淨湼槃,亦即無住湼槃之體;圓淨 ,即無住

湼槃之相;方便淨,即無住湼槃之用。其有餘依、無餘依二種,若在二乘分中 ; 則

沙無明及變易也。若在如來分中,則攝屬方便淨。初成道時,示同二乘之有餘依; 攝屬圓淨 。以是圓淨之少分故,但顯偏眞,未顯俗諦中諦;但淨見思分段,未淨塵

今滅度時,示同二乘之無餘依也。

略說」者,對平日廣說,此爲要略;又對大機所見大般湼槃經,此爲簡略故。

#### 二出譯人

# 姚秦三藏法師鳩摩羅什譯

姚興建國 ,亦稱爲秦,故名「姚秦」。

三藏」者,經律論也。經詮一心,律規三業,論開慧辯。以茲三學自軌軌他,名

爲「法師

鳩摩羅什」,此云童壽,童年時便有耆德故。翻梵成華,名之曰「譯」。

# 二入文爲三:初序分,二正宗分,三流通分。 今初

者 釋迦牟尼佛 , 皆已度訖 ,初轉法輪 。於娑羅雙樹間 ,度阿若憍陳如;最後説法 ,將入湼槃。是時中夜 ,度須跋陀羅。所應度 ,寂然無聲 , 爲諸弟

子略説法要

者,佛以自心中所悟四諦之法,度入一切衆生之心,名之爲「轉」;此法能摧衆生 略同 慈悲 有異 梵語「阿若」 煩惱業苦三障,名之爲「輪」。陳如聞此法故,見四諦理,出生死海,名之爲度 佛成道已 四諦法輪 釋迦 。具此總別二相,名之爲佛,義如前解。論判此句,是法師成就畢竟功德也。 , 不住無爲 故論中稱爲別相;約名,則諸佛理同 」,此翻能仁,佛之姓也。「牟尼」,此翻寂默,佛之名也。約姓 一,說法四十九年,度人無量,今舉初後,以括始終。初在鹿野苑中,三轉 , 憍 , 陳如最先得度;乃至湼槃會上,須跋陀羅最後得度 此翻爲解,亦翻無知。解者,明見四眞諦理;無知者,根本智證見 ,此相與二乘全別;「寂默」則具大智慧,不住有爲 ,故論中稱爲總相 。又「能仁」 。言「轉法輪 ,此相 ,則事相 一則具大 與二乘

聞 好賢 諦理 後說法」二句,論名爲開法門成就畢竟功德。「度阿若憍陳如」 八聖道 ,不存能所故也。「憍凍如」,此翻火器,乃尊者之姓。「 須跋陀羅 」,此翻 或翻善賢。本是外道,住鳩尸 遂得 初果 ,因即出家 0 嗣聞 .那城。年一百二十,聞佛將湼槃,方往佛所 四諦 , 成阿羅漢 。是中「 及「度須跋陀羅 初轉法輪 」及「最 0

二句,論名爲弟子成就畢竟功德也

句 常 以離斷離常爲中道也 大總相成就畢竟功德也。 所應度者,皆已度訖 。繇大小機異,故異見耳。「中夜」,即表中道。大乘以非榮非枯爲中道,小乘 祭一枯 爲因果自相成就畢 ,上枝相合,下根相連 。「寂然」者,心行處滅 一竟功德 ,明佛智鑒機, 娑羅」,此翻堅固 0 謂 ,以表 雙樹 四德 恆無忘失,得益之衆,算數莫窮 」間,是因自相 ,破於 0 0 雙樹 無聲」者,言語道斷 八倒 。或惟見一 」者,此樹四方各二, ; 將入湼槃 雙, 即表 論名此 , ,論名爲 是因共 破 各各 於斷 几

上首眷屬人位差別。「法要」者,世出世間法位差別。論名此句爲分別總相成就畢

果自相

是時中夜

」,是總自相

;「寂然無聲」,是果自相也。

「諸弟子」

者

竟功德也。

夫垂入湼槃 ,則無復再會;已在中夜,則爲時不多,故取要略說,以作最後警策

真不啻一字一血矣!讀者可弗思乎!

知此則是汝等大師,若我住世,無異此也 汝等比丘,於我滅後,當尊重珍敬波羅提木叉。如誾遇明,貧人得寶。當 淨戒,次明方便遠離清淨戒 治 邪業法要 正宗分爲二:初 ,二對治 止苦法要 明共世間法要,二明不共世間法要。 , 三明戒能生諸功德 , 三對治滅 煩惱法 ,四說勸修戒利益。 要。 初 又 四 : 初中三: 初 明 根本清 今初 初 對

故;二者,示摩訶衍方便道,與二乘共故;三者,比丘爲四衆之首,舉其首以該四 之遺敎,通誡一切四衆弟子,而經中處處獨舉比丘者,亦有三義:一者,示遠離相 比丘 , 此翻除饉 , 即 福 田之稱也。又含三義 … 一怖魔,二乞士,三破惡 然佛

言「滅後」者,即示現遺教義 。「波羅提木叉」,此翻保解脫,亦翻別別解脫 ,亦亦

衆,亦皆同遠離行故

佛遺教經解

以戒爲師 遇明」;得度空無善根障,故云「如貧得寶」。佛在世時,以佛爲師 云處處解脫 。不能持戒,則同堂猶隔萬里;苟能持戒,則百世何異同時 。此即是不盡滅法 。依此法身,度二種障: 得度煩惱暗障 0 , 故云「 金口誠言若 佛滅度後 如闇

次明方便遠離清淨戒

此

,奈何捨此別求

應作 自活 占相吉凶,仰觀星宿 及諸財寶 持淨戒者 0 ,不得參預世事 當自端心 ,皆當遠離,如避火阬;不得斬伐草木,墾土掘地。合和湯藥 7 不得販賣貿易 ,正念求度;不得包藏瑕疵,顯異惑衆;於四供養 , 1 通致使命 推步盈虚 ,安置田宅 0 ,歷數算計 呪術仙藥 ,畜養人民、奴婢、畜生;一 ,皆所不應 7 結好貴人 , 。節身時食 親厚媒慢 切種植 7 7 清淨 知量

應畜積」,是護戒令不同外道損智 是中 有二段文:從初至「 墾土 掘地」, 是護戒令不同凡夫增過;從「占相」至「不

知足

趣得供事,不應畜積

0

地,是不順威儀及損衆生增過。此十一種增過事,修行菩薩宜速遠離,不應親近 是積聚增過。十皆當遠離,如避火阬,是不覺增過。十一不得斬伐草木,墾土掘 得安置田宅,是所居業處求多安隱增過。五不得畜養人民,是眷屬增過。此示外眷 貿易,是交易求利增過。若依世價,無求利心,不犯。賣買法式,如律廣說。四不 或有爲衆許開者,具如律說,大須精審也。 不得畜畜生,是養生求利增過。八不得一切種植,是多事增過。九不得畜諸財寶 屬 初中凡十一事:一不得販,是方便求利增過。二不得賣,是現前求利增過。三不得 非同意者。六不得畜奴婢,是難生卑下心增過。以向此等人,易生我慢故 。七 ,

第二文中,先總遮五事,次明三處波羅提木叉。

先五事者:一不得合和湯藥,二占相吉凶,三仰觀星宿,四推步盈虛,五歷數算 。凡此皆屬邪心求利,不達正因緣法,故遮止也。

障。三清淨自活,對治共相追求障。四不得參預世事,是自性止多事。五不得通致 次身處波羅提木叉,有五句:一節身,對治他求放逸障。二時食,對治內資無厭足

使命,是自性尊重,不作輕賤事。

邪藥作世辯不正語。即「呪術仙藥」是也。二者,依邪人語。謂與族姓同好,多作 次口處波羅提木叉,有二種邪語不應作:一者,依邪法語。謂邪術惱衆生語,及依

**鄙媟語;及親近族姓,多作我慢語。即「結好貴人,親厚媟慢」是也。** 

二「正念求度」,對治邪思惟障,能自度下地故。三「不得包藏瑕疵」,不汙淨 次意處波羅提木叉,有六句:一「當自端心」,對治多見他過障,不犯自淨心故

戒,不受持心垢故。四「不得顯異惑衆」,遠離無緣顯己勝行,令他不正解故。五

一;若入道分 於四供養 ,知量知足」,對治於受用衆具中無限無厭足障。若入三昧分,則知 ,則知足故 0 四供養 ,謂飲食、衣服、臥具、醫藥也。<br/>
六「趣得供

事,不應畜積」,遠離貪覆心貯積衆具故

量

三明戒 能 生諸功德 以上方便遠離凡夫及外道過,則令戒身淸淨,堪紹如來淨法身也。

此則略説持戒之相。戒是正順解脱之本,故名波羅提木叉。因依此戒,得

此戒爲本。因戒生定,因定發慧,定慧無不從戒生也。 說。繇此戒故,能度身口意惡彼岸,成就三業解脫。是故行人若欲正順解脫,必以 戒體惟一,所謂無作;戒相至多,所謂五篇七聚。今舉恆情最易犯者言之,故名略

四說勸修戒利益

戒,諸善功德皆不得生。是以當知,戒爲第一安隱功德住處 是故比丘,當持淨戒,勿令毁缺。若人能持淨戒,是則能有善法;若無淨

隱功德住處」,是勸住安隱處,勿住不安隱處也。初對治邪業法要竟 便。三「能有善法」,是勸常集功德。四「若無淨戒」等,是勸知多過惡 是中凡有五勸:一「當持淨戒」,是勸不失自體。二「勿令毀缺」,是勸不捨方 。五「安

二對治止苦法要三:初根欲放逸苦對治,二多食苦對治,三懈怠睡眠苦 對治。 初中二:初根放逸苦對治,二欲放逸苦對治。 今初

汝等比丘,已能住戒,當制五根,勿令放逸,入於五欲。譬如牧牛之人,

根賊 也;亦如惡馬,不以轡制,將當牽人墜於阬埳。如被劫賊,苦止一世;五 執杖視之,不令縱逸,犯人苗稼。若縱五根,非唯五欲將無涯畔,不可制 禍 , 殃及累世。爲害甚重,不可不慎!是故智者制而不隨 ,持之如

賊 ,不令縱逸;假令縱之,皆亦不久見其磨滅 0

聲香味觸 初 已能住戒」,指前根本、方便二種言之。以下正明護根法要,凡有三喩: 當制五根」下,是牧牛喩。先法,後喩。五根,謂眼耳鼻舌身。五欲,謂色 0 牛,喻五根;牧人,喻比丘;執杖,喻戒念;苗稼,喻諸善功德,即定

念;阬埳 次,「若縱五根」下,是惡馬喩。亦先法,後喩。惡馬,亦喩五根;轡制,亦喩戒 ,喻三惡道。蓋縱五根,不惟妨善,又必墜惡,故云:「非唯五欲,將無

非制而不隨,豈得名爲智者?又假令縱之,不久磨滅。如刀刃上蜜,不足一餐,小 如被劫賊」下,是劫賊喩 。
先喩 ,後法。「殃及累世」,其禍 甚於劫賊 ,倘

涯

畔

也。

慧等法也

#### 二欲放逸苦對治

之, 當勤精進,折伏汝心 怨賊、大火越逸,未足喻也。譬如有人,手執蜜器,動轉輕躁,但觀於 蜜,不見深阬。譬如狂象無鈎 此五根者,心爲其主,是故汝等當好制心。心之可畏,甚於毒蛇 無令放逸。 縱此心者,喪人善事;制之一處,無事不辦 ,猿猴得樹,騰躍踔躑,難可禁制 。是故比丘 。當急挫 、惡獸

無二念三昧;二者,輕動不調障,能障調柔不動三昧;三者,失諸功德障,能障起 言「好制心 五根是色法,頑鈍無知,依心而轉,故皆以心爲主。所以欲制五根,莫如制心 」者,應知此心有三種三昧相,有三種障法:一者,心性差別障,能障

吞害善根,過於惡獸 文中「心之可畏」等,先明心性差別障。貪分煩惱吸噬善根,過於毒蛇;瞋分煩惱 ;癡分煩惱損滅善根,過於怨賊;等分煩惱焚燒善根 ,過於大

多功德三昧

樹 修一切行時,困苦不能成就障礙。 ) 「狂象無鈎」,喻心無三昧法所制。 「猿猴得 唯緣現世六塵 根受五塵樂。「 火越逸 」,喩心緣六塵境生染。故當急挫,令入調柔不動三昧也。 。故云「未足喩也」。次「譬如有人」下,明輕動不調障。「蜜器」,喩五 0 「不見深院 動轉輕躁 , 」,喻不知未來障礙 喻轉識隨逐諸根,念念不定。「但觀於蜜」,喻六識 0 障礙有二種 : 生處障 礙 ; —

相 次「 ; 縱此心者,喪人善事」,明失諸功德障 無事不辦」句,示起多功德三昧相;「精進折伏汝心」句,示調柔不動三昧 。次「制之一處」句,示無二念三昧

相

#### 二多食苦對治

饑渴 惱 汝等比丘,受諸飲食,當如服藥,於好於惡,勿生增減,趣得支身 7 無得多求,壞其善心。譬如智者,籌量牛力所堪多少,不令過分,以 0 如 蜂 採 華, 但取其味,不損色香;比丘亦爾 ,受人供養 , 趣 ,以除 自 除

竭其力。

四

減」,是好惡平等觀 多食能障三昧 ,故以五觀治之:一「當如服藥」,是受用對治觀。二「 。三支身除饑渴 ,是究竟對治觀。四「如蜂採華」等,先喩 勿生增

後法,是不損自他觀。五「譬如智者,籌量牛力」等,是知量知時觀也。

藥以療病,食以療饑,苟可療饑則已,奈何於好便貪心增噉、於惡便瞋心減受耶? 趣 一者, 裁取 。「支」者,支持 。「蜂」喩比丘,「華」喩供養 ,「味」喻借此

牛能負重,然所負過分,其力則竭;喩比丘雖爲人世福田,然貪受多供,則其道自 修道除惱,「色香」喻自他善心。貪食多求,旣損自三昧善,亦損檀越善心也

三懈怠睡眠苦對治

敗矣

眠,不自警寤?煩惱毒蛇睡在汝心,譬如黑蚖在汝室睡,當以持戒之鈎早 燒諸世間 經,以自消息。無以睡眠因緣,令一生空過,無所得也。當念無常之火 汝等比丘,晝則勤心修習善法 ,早求自度 ,勿睡眠也。諸煩惱賊常伺殺人,甚於怨家,安可睡 ,無令失時;初夜後夜,亦勿有廢。中夜誦

慚恥 嚴,最爲第一。慚如鐵鈎,能制人非法,是故常當慚恥,無得暫替。若離 摒 除之。睡蛇既出,乃可安眠;不出而眠,是無慚人!慚恥之服 , 則失諸功德。有愧之人,則有善法;若無愧者,與諸禽獸無相異 ,於諸莊

也。

亦二:一者,三界依報,是器世間;二者,六道正報,是衆生世間 初觀察對治中,無常有二:一者,一期生滅,爲麤;二者,念念生滅,爲細。世間 至「不自警寤」,是觀察對治;二從「煩惱毒蛇」至「無相異也」,是淨戒對治 眠 失時」,是對治從食所起睡眠;「初夜後夜,亦勿有廢」等,是對治從時所起睡 然此睡眠,從三事起:一從食起,二從時節起,三從心起。經中「勤修善法,無令 心懶惰故懈怠,身悶重故睡眠。此二相須,共成一苦。障於定慧,令不得生。 ;「當念無常之火」以下,皆對治從心所起睡眠。復有二意:初從「當念無常 。依正皆歸磨

滅

無可停留

,故如火燒

。且愛見二種煩惱

,約三界九地,則見有八十八使,

八十一品,無不足以傷法身、戕慧命,故尤甚於怨家。如此觀察警寤,名觀察對治

於禽獸,正在此耳!可弗勉乎!二對治止苦法要竟。 希聖賢,名爲無慚;不恥卑下,名爲無愧。慚愧二善心所,起必同時。人之所以異 種子未斷而輒安眠,則不知尊重己靈,名爲無慚;不知羞己過惡,名爲無愧。又不 可安眠」。是故阿羅漢斷心眠已,不斷食起時節起眠,以彼眠不爲葢故 永滅八識田中煩惱種子,名爲「睡蛇旣出」。從此所作已辦,不受後有,名爲「乃 鈎」者,木叉戒,能防身口;定共戒,能伏心惑;道共戒,能斷心惑。具此三戒 畏,猶如黑蚖,不起則已,起必殺人法身慧命。自非持戒之鈎,何能摒除?言「戒 次淨戒對治中,謂煩惱雖不現行時,亦未嘗不眠伏在汝藏識心中。而此煩惱毒害可 。今若煩惱

= 對治滅煩惱法要三:初瞋恚煩惱障對治,二頁高煩惱障對治,三諂曲

煩惱障對治。 今初

汝等比丘,若有人來節節支解,當自攝心,無令瞋恨;亦當護口,勿出惡 言。若縱恚心,則自妨道,失功德利。忍之爲德,持戒苦行所不能及。能

世,人不喜見。當知瞋心,甚於猛火,常當防護,無令得入。劫功德賊 之人,而懷瞋恚,甚不可也。譬如清冷雲中,霹靂起火,非所應也 無過瞋恚。白衣受欲,非行道人,無法自制,瞋猶可恕;出家行道,無欲 名入道智慧人也。所以者何?瞋恚之害,則破諸善法,壞好名聞,今世後 行忍者,乃可名爲有力大人。若其不能歡喜忍受惡罵之毒如飲甘露者,不

文有六節:

初、「若有人來節節支解」,是舉所忍之境以重況輕。支解尚在所忍,餘諸逆境何

足介懷?

次、「當自攝心」等,正示堪忍之相。「無令瞋恨」,則身意淸淨;「勿出惡

言」,則口業淸淨也。

三、「若縱恚心」等,明不忍之失。「自妨道」者,不能自利;「失功德利」者,

不能利他。恚心一起,二利俱喪,甚明其不可縱也。

四、「忍之爲德」等,深歎勝力,以勸修行。蓋持戒者,未必能忍辱;忍辱者,決

我心而持戒 無不持戒。所以六度之中,戒居第二,忍居第三。以前不兼後,後必具前故也。以 。則報僅在人天;以無我而行忍,便成出世大道。犯而不校,譬如海闊

天空,一任鳶飛魚躍,故名「有力大人」。

五、「 之因 念瞋心起,百萬障門開。破諸善法,何能自利?壞好名聞,何能利他?今世無二利 釋迦真善知識。設不於惡罵作甘露想,不能歡喜忍受,便是愚癡,未聞道故。況 成我忍力 ,後世無二利之果 若其不能 如豬揩金山,金則愈光;石磨良劍 **」等,重明不忍之過,以誡行人。甘露,是不死之藥。因他惡罵** , 誰當喜見之者?所以欲護自利善法 ,劍則愈利 。所以歌利 ,當防瞋火;欲護利他 調達 皆是

六、「 過:一者受欲,欲與瞋相爲表裡;二不行道,無善法以制心,故瞋猶可恕。 人造罪,是其分內,不足深責也。出家行道無欲,如清冷雲,豈容懷瞋恚心 白衣受欲」等,結況不應。從人至六欲天,未入道者,皆名白衣。彼有二 所謂俗 如起

功德

,

當防瞋賊也

霹靂火耶

#### 二貢高煩惱障對治

道之人,爲解脱故 汝等比丘,當自摩頭,已捨飾好,著壞色衣,執持應器,以乞自活,自見 如是,若起憍慢,當疾滅之。增長憍慢,尚非世俗白衣所宜,何況出家入 ,自降其身而行乞耶

!

役 初中,有五句對治:一「當自摩頭」,則無冠冕以嚴首。二「已捨飾好」,則無劍 佩 文有二節:初「汝等比丘」下,正設對治;二「增長憍慢」下,較量不應 以飾 。五「以乞自活」,則無帑藏以積財。故應用智慧常自觀察,設起憍慢,便應疾 [身。三「著壞色衣」,則無五彩以煥服。四「執持應器」,則無僮僕以供

器」, 壞色衣」,即三種袈裟及一切下裙坐具等,皆用青、黑、木蘭三種壞色。「應 即鉢多羅 。體、色、量三,皆悉應法。體惟瓦鐵二物,色則熏如鳩鴿

隨腹大 小小也

疾滅除之也

次文舉白衣較量,白衣尙不宜憍慢,況求解脫者耶!

誑,入道之人,則無是處。是故汝等,宜當端心,以質直爲本。 汝等比丘,諂曲之心,與道相違,是故宜應質直其心。當知諂曲但爲欺

逢迎希合之言,名諂;隨境逶迤之念,名曲。諂則不質,曲則不直。祇爲自欺誑 亦欺誑他人,決非入道者所有也。直心是道場,心言直故,永無諸委曲相 。設非正

念真如,豈得名「端心」哉?初明共世間法要竟。

德 0 二知足功德。三遠離 明不共世間法要,謂成 功德。 就出世間大人功德也。文分爲八:初無求功 四不疲倦功德。五不忘念功德。六禪定功

德

。七智慧功德。八畢竟功德。

今初

,

則無 事有餘,常無不足。有少欲者,則有湼槃。是名少欲 汝等比丘,當知多欲之人,多求利故,苦惱亦多;少欲之人,無求無欲 此患。直爾少欲,尚宜修習,何況少欲能生諸功德!少欲之人 ,亦復不爲諸根所牽。行少欲者 ,心則坦然 ,無所憂畏 ,則無 觸

文有五種所知覺相:

知覺障相 。謂「多欲」是煩惱障,「多求」是業障,「苦惱亦多」是報障也。

二知覺治相。謂「無求無欲,則無此患」也。

五知覺果成就相。謂「心則坦然」,故法身成就;「無所憂畏」,是般若成就; 牽,是無苦障。蓋眼根牽人受色,乃至身根牽人受觸,令人不得自在,是大苦故 四知覺無諸障畢竟相。謂無諂曲 三知覺因果集起相。謂少欲無患,已應修習,況能生諸功德,成就無量聖善法耶! 觸事有餘,常無不足」,是解脫成就。三德具足,名大湼槃。是知少欲爲因,湼 ,是無惑障;無求人意,是無業障;不爲諸根所

槃爲果也。

二知足功德

者,雖富而貧;知足之人,雖貧而富。不知足者,常爲五欲所牽,爲知足 足之人,雖卧地上,猶爲安樂;不知足者,雖處天堂,亦不稱意。不知足 汝等比丘,若欲脱諸苦惱,當觀知足。知足之法,即是富樂安隱之處 。 知

### 者之所憐愍。是名知足。

前無求功德,是遠離他境界事;今知足功德,是於自事中遠離也。

文中,欲脱苦惱,是對治苦因果;富樂安隱,是復說淸淨因果

牽與憐愍對辨,是約二法(無自利、有自他利)示現差別。一則常爲五欲所牽,是 次地上與天堂對辨,是約二處示現差別;又富與貧對辨,是約二事示現差別;又欲

無自利:一則五欲不牽,是有自利,又能憐愍不知足者,是有利他也。

#### 三遠離功德

衆惱;譬如大樹,衆鳥集之,則有枯折之患。世間縛著,没於衆苦,譬如 天所共敬重。是故當捨己衆他衆,空閒獨處,思滅苦本。若樂衆者,則受 汝等比丘,欲求寂靜無爲安樂,當離憒鬧,獨處閒居。靜處之人,帝釋諸

文有三門攝義:一自性遠離門,體出故,示現四種對治。

老象溺泥,不能自出。是名遠離

0

謂「寂靜無爲安樂」,對治我相執著障。寂靜,即法無我空;無爲,即無相空;安

經解

樂,即無取捨願空也。

當離慣鬧」,對治我所障。五陰亂起,無有次第,名慣鬧也。

獨處閒居」,對治彼二無相障。謂我及我所,本自無相,今修三三昧,顯無相

「 帝 澤 諸 天 所 共 散 理 , 彼 障 隨 滅 也 。

帝釋諸天所共敬重」,對治無爲首功德障。靜處是可重法,於諸善法最爲首故

也。

二修習遠離門,方便出故。「己衆」,謂五陰心心所法。「 他衆 」,謂師徒同學。 空閒獨處」,如法而住,是方便慧成就。「思滅苦本」,遠離起因,是善擇智成

就也。

此諸見集生,喩招枯折之患。又因見成業,因業招苦,故喩如老象溺泥,不能自 心所法,此約己衆言之。大樹,喩比丘;衆鳥,喻同學弟子等,此約他衆言之。從 三受用諸見門,常縛故。謂「樂衆者,則受衆惱」。大樹,喩第六識;衆鳥,喩諸

出。老

,譬觀智衰微,即是惑障。象身重大,譬縛著情厚,即是業障。溺泥,譬沒

四不疲倦功德

則能穿石。若行者之心數數懈廢,譬如鑽火,未熱而息,雖欲得火,火難 汝等比丘,若勤精進,則事無難者,是故汝等當勤精進。譬如小水長流,

可得。是名精進

0

也。次以小流穿石,喻恆不休息之功。鑽火數息,喻懈怠失念之過。如文可知 勤則不惰,精則不雜,進則不退。所以三乘聖果,剋獲無難,不同外道無益苦行

五不忘念功德

强,雖入五欲賊中,不爲所害;譬如著鎧入陣,則無所畏。是名不忘念。 則不能入。是故汝等,常當攝念在心。若失念者,則失諸功德。若念力堅 汝等比丘,求善知識 善思惟行,即求善護。三如法修行,即求善助。此三行亦名三慧。慧以照了爲義 此不忘念,是一切行上首。言一切行者,略說三種:一聞法行,即求善知識。二內 ,求善護助,無如不忘念。若有不忘念者,諸煩惱賊

三行者,能破無始煩惱怨賊,是故常當攝念在心;即著堅鎧入陣,則不被賊害,而 漏器雖受而失。無修行,如穢器雖不漏失,穢不可用。今有不忘念,則有三行 行以進趣爲義 。照了進趣,悉繇不忘念也。無聞行,如覆器不能受水。無思行 , 如 有

能殺賊矣!

六禪定功德

塘;行者亦爾,爲智慧水故,善修禪定,令不漏失。是名爲定。 等,常當精勤修習諸定。若得定者,心則不散。譬如惜水之家,善治隄 汝等比丘,若攝心者,心則在定。心在定故,能知世間生滅法相 。是故汝

攝心,謂善巧方便,訶棄下地心行,便能次第證入諸禪,乃至出生種種三昧也。心

旣在定,則如杲日當空,明照萬象,故即能知世間生滅法相

言精勤者,對治三種懈怠:一精勤修習節量食臥,調出入息;對治不安隱懈怠

怠。 二精勤修習覺知諸定,有通慧功德,能盡苦源,及能成就大希有事;對治無味懈

三精勤修習觀察生老病死苦,及四惡趣苦我未能離;對治不知恐怖懈怠

繇修習此三對治已,心則不散。無所對治,便能發無漏慧,斷惑證果也。舉喩合

法,在文易知

七智慧功德

惱樹之利斧也。是故汝等,當以聞思修慧而自增益。若人有智慧之照 無天眼 度老病死海堅牢船也,亦是無明黑暗大明燈也,一切病者之良藥也,伐煩 能得解脱 汝等比丘, ,而是明見人也。是名智慧 0 若不 若有智慧 爾者 ,既非道人,又非白衣,無所名也。實智慧者 ,則無貪著。常自省察,不令有失,是則於我法中 , 則是

若有智慧,則無貪著」,是標實慧離障功德。謂遠離眞實義處障,及世間事處障

故。

繇斷迷理無明,故六七二識,不貪著第八識之見分以爲我法,是名遠離眞實義處

障。

繇斷迷事無明,故前六識,不於六塵境界而生貪著,是名遠離世間事處障也。

謂繇三慧 如堅牢船 今既出家 常自省察,不令有失」, ;斷集諦智,如大明燈;證滅諦智,猶如良藥;修道諦智,猶如利斧 ,又無四慧,進退咸失,故無所名也。次以四喩,喻實智慧。見苦諦智 ,得證實智慧也。 是總勖增益聞思修慧。 增益三慧以證實慧 ,乃名道人;未曾出家 「是則於我法中 , 能得解脫 ,乃名白衣 , 0

念。 諦理,發無漏實慧,證四道果。因中三慧,未具天眼;慧解脫人,亦無天眼, 然實智難證 四諦分明 觀行位中,思慧增益,得入煖頂忍世第 ,不墮邪見,則是明見人矣!且約藏教義解如此,通教例知 ,故必當以聞思修慧而自增益。 名字位中,聞慧增益,得入停心別總相 一法。相似位中,修慧增益 ,以是三乘共 , 得 見四聖 然皆

八畢竟功德

方便故

捨離亂心戲論,若汝欲得寂滅樂者,唯當善滅戲論之患。是名不戲論 汝等比丘,種種戲論 ,其心則亂 ,雖復出家 ,猶未得脱 。是故比丘,當急 0

滅樂 皆是無始名言戲論 真如湼槃,本性淸淨 0 初果得實智慧,見四聖諦,分別煩惱雖已永斷,而三界九地八十一品思惑 熏習所成,令心擾亂,不契真常,是故當急捨離戲論 ,言語道斷, 心行處滅 ,本非戲論所行境界,繇戲論故 , 乃得湼槃 () 違寂

等 邊即 戲論 言 墮絕言見 說權說實 竟不生也。此亦且約三藏義解 寂滅之樂 ,不作 善滅」者,即以所得四諦實慧,重慮緣眞 中 。又即空不具,仍是戲論 , 乃非戲論 , ,仍屬戲論 解 說本說跡,亦皆戲論;觀心若起,本跡俱絕,乃非戲論 ,不作一解,不作亦一亦二解,不作非一非二解 。又對權明實 ;知四句皆不可說,有因緣故亦可得說 ;中道不空,乃非戲論 ,若開顯者,眞居事外,仍是戲論;即事恆眞 , 仍帶戲論 ; 開 ,數數觀察,淨除業識種現,令其究 權顯實 。又離邊立中 , 無麤非妙 ,說與不說 , 乃非戲論也 。又唯貴默然 , , 乃非戲 仍是戲論 , 性自平 0 論 ,乃非 ; 0 又 即

正宗分竟

0

三流通分爲四:初勸修流通,二證決流通,三斷疑流通,四囑付流通。

今初

益, 聞之不行 悔 處靜室,念所受法,勿令忘失,常當自勉,精進修之,無爲空死,後致有 汝等比丘,於諸功德,常當一心,捨諸放逸,如離怨賊 。我 皆已究竟 如良醫,知病説藥,服與不服,非醫咎也。又如善導,導人善道, ,非導過也。 ,汝等但當勤而行之。若於 山間 ,若空澤中,若在樹下 。大悲世尊所説利 ,閒

也。「常當一心」者,依第一義心而修也。「捨諸放逸,如離怨賊」者,遠離一心 諸功德 , 指正宗分中共世間法要三種對治功德,及不共世間法要八種大人功德

相違行也。

所說利益

,皆已究竟」者,無限劑大悲,於法無遺吝也

也。 此 中 何所修?謂「念所受法」也。何故修?謂「勿令忘失」也。以何方便修?謂 ,云何 修?謂宜 一勤而 行之」 也。何處修?謂山間 , 空澤 ` 樹下 、閒處靜室

「常當自勉,精進修之」也。

若未入眞實,皆名空死。若得少爲足,後必有悔。悔何及哉!

約滅惡拔苦,喻如良醫;約生善與樂,喻如善導。佛不負衆生,衆生多負佛耳!可

不悲夫!

二證決流通

無疑 苦,不可令樂 白佛言:世尊 滅;滅苦之道,實是真道,更無餘道。世尊!是諸比丘,於四諦中,決定 如是三唱,人無問者。所以者何?衆無疑故。時阿翁樓馱,觀察衆心,而 汝等若於苦等四諦有所疑者,可疾問之,毋得懷疑,不求決也。爾時世尊 !月可令熱 ;集真是因 ,更無異因;苦若滅者,即是因滅 ,日可令冷,佛説四諦不可令異。佛説苦諦實 ,因滅故果

盡出世因果。故於四諦懷疑,則一切法咸皆有疑;苟於四諦無疑,則一切法皆得無 如來一代教法,義理雖多,四諦攝盡。以苦集二諦,攝盡世間因果;滅道二諦

疑。所以垂滅殷勤三唱,深顯除四諦外更無餘法也。文中有三門攝義,示現決定無

從初至「不求決也」,是第一方便顯發門。以此四諦,乃修行者常所觀察,及依之

起行故。

功德滿足成就也

從「爾時世尊」至「衆無疑故」,是第二滿足成就門。於中,「如是三唱」句,示 現法輪滿足成就;「人無問者」句,示現證法滿足成就;「衆無疑故」句,示現斷

從「阿遙樓馱」至「決定無疑」,是第三分別說門。阿遙樓馱,亦云阿那律,亦云 饑世,施辟支佛一食,獲九十一劫中往來人天,常受福樂,至今不滅,所求如意 阿泥樓豆 ,亦云阿難律陀,皆梵音楚夏耳。此翻無貧,亦翻無滅,亦翻如意。昔於

陽精 故有得神通者,便可令月熱日冷。至於佛所說之四諦,乃是衆生心性法爾道理,理 故熱 0 然此依報器世間法 ,皆是吾人唯識所現,即是識之相分 ,本無實法

故得此名。天眼第一,故能觀察衆心,決定分別說也。月是太陰精,故冷;日是太

無變異 。如苦諦者,三界二十五有,下自阿鼻地獄,上至非非想天,雖升沈迥異

安樂?如道諦者,戒定慧三,能斷苦因苦果,至無苦處,安有餘道?此四皆審實不 然無不爲四相所遷、八苦所逼,安可令樂?如集諦者,見思二惑,善惡不動三有漏 ,的的是牽生三界之因,豈有異因?如滅諦者,因滅則苦果隨滅,豈非寂靜無爲

虚 ,故名爲諦 0 佛如實說,比丘亦如實解 ,所以決定無疑也

三斷疑流通又三:初顯示餘疑,二爲斷彼彼疑,三重說有爲無常相勸

修。今初

説 於此衆中,所作未辦者,見佛滅度,當有悲感。若有初入法者,聞佛所 7 即皆得度 ;譬如夜見電光,即得見道。若所作已辦,已度苦海者,但

作是念:世尊滅度,一何疾哉!

此仍是阿笺樓馱分別語也。於中有三種分別:

所作未辦者,指初果二果三果。以思惑未盡斷故,當有悲感,如阿難愁憂等是

佛遺教經解

也。

二初入法者,指內外凡。繇觀行力深,故今一聞佛法,速疾見道,如夜見電光,更

非延緩。以見道一十六心,不出一刹那故也。

三所作已辦者,指阿羅漢 。見思斷盡,永超三界苦海,故無復情愛悲感;但未知佛

實不滅,故謂滅度何疾也。

### 二爲斷彼彼疑

滅;會而不離,終不可得。自利利他,法皆具足,若我久住,更無所益 以後,我諸弟子展轉行之,則是如來法身常在而不滅也。 應可度者,若天上人間,皆悉已度;其未度者,皆亦已作得度因緣。自今 固 阿翁樓馱雖説此語,衆中皆悉了達四聖諦義,世尊欲令此諸大衆皆得堅 ,以大悲心,復爲衆説:汝等比丘,勿懷悲惱。若我住世一劫,會亦當 0

四聖諦者,證此四諦,得成聖果,故名聖諦;又理雖固然,唯聖諦了,故名聖諦

也。

時衆雖悉了達,而如來悲心淳至,普爲未來永斷餘疑,所以復爲衆說。是中,文亦

#### 分三:

初從「 法皆具足」,便可依之修道。至於會必有離,自是世法應爾;且我久住,於汝無 勿懷悲惱」至「更無所益」,即斷所作未辦見滅悲感之疑。旣「自利利他

益,何用悲感爲哉?

二從「 者,皆已爲作得度因緣,因緣若到,勿愁不見道也。 聞說即皆得度;佛滅度後,見道無繇!」故今釋曰:所應度者,我已度訖;縱未度 應可度者」至「得度因緣」,即斷電光見道之疑。謂有疑曰:「佛住世時

機,故且說五分法身爲常住耳。若入實者,應化亦常。靈山一會,儼然未散,非欺 持不壞;旣法身常在不滅,則果分住持不壞。因果俱常,何云疾滅?然此仍對權 三「自今以後」至「而不滅也」,即斷滅度何疾之疑。旣弟子展轉行之,則因分住

我也。

三重說有爲無常相勸修

是故當知,世皆無常,會必有離,勿懷憂惱,世相如是。當勤精進,早求

滅之,如殺怨賊而不歡喜! 病。此是應捨罪惡之物,假名爲身,没在老病生死大海;何有智者,得除 解 脱 ,以智慧明 ,滅諸癡暗。世實危脆,無堅牢者,我今得滅 ,如除惡

文有二意:從初至「無堅牢者」,正明無常觀門,以勸勤修。

從「我今得滅」以下,是引己作證也。佛妙色身,等真法性,無量功德莊嚴顯現

而云是罪惡物,喻以惡病怨賊者,示同凡夫,令警省耳!三斷疑流通竟。

四囑付流通

相。汝等且止,勿得復語,時將欲過,我欲滅度。是我最後之所教誨 汝等比丘,常當一心,勤求出道,一切世間動不動法,皆是敗壞不安之

故勸令精進以修之也。欲界爲動法,色無色界爲不動法,雖有動靜之殊,總屬無常 常當一心」,是囑令住於實慧。「勤求出道」,是囑令方便修習。以實慧難得,

無我,不可不思出離也。

「 勿得復語 」,是勸止三業,成就寂滅無我法器。「 時將欲過 」,是示當歸滅,不

所誤

離中道以爲究竟

嗚呼!末後殷勤,悲心極矣!爲弟子者,宜何如鏤骨銘肝也。 「最後教誨」,是正顯遺訓,住持法中最勝最要。

佛遺教經解

跋語

向西方。仍作迦陵頻伽,代彌陀廣宣法要可矣!甲申九月二十日記 徒以語言文字而作法施,何異諸天說法鳥耶?然一隙之明,弗忍自吝,藉此功德,回 虚度,二十餘年,空無剋獲。旣非道人,又非白衣。方撫心自愧,對鏡生慚。而虛名 旭未出家時,讀此遺敎,便知字字血淚;旣獲剃染,靡敢或忘。所恨慧淺障深,悠悠 ,謬膺恭敬。承甫敦沈居士,固請解釋此經。嗟夫!予不能臻修世出世間 功德

#### 三八

## 唐太宗文皇帝施行遺教經勑

法者, 行業,與經文不同,宜公私勸勉,必使遵行。( 含百九十三卷) 行。所須紙筆墨等,有司準給。其官宦五品已上,及諸州刺史,各付一卷。若見僧尼 隱 義 若縱情淫佚,觸塗煩惱,關涉人間,動違經律,旣失如來玄妙之旨,又虧國王受付之 , 。遺教經,是佛臨湼槃所說,誡勒弟子,甚爲詳要。末俗緇素,並不崇奉。大道將 微言且絕。永懷聖教,用思弘闡,宜令所司,差書手十人,多寫經本,務盡施 如來滅後,以末代澆浮,付囑國王大臣,護持佛法。然僧尼出家,戒行須備

## 宋真宗皇帝刊遺教經

之增長。是以迦維之聖,出世而流慈;舍衛之區,隨機而演法。旣含靈而悉度,將順 俗以歸真。猶於雙樹之間,普告大乘之衆,示五根之可戒,問四諦之所疑;期法奧之 夫道非遠人,教本無類 ,雖蠢動之形各異,而常樂之性斯同。由愛欲之紛綸 ,致輪迴

導秘詮 宣揚,俾衆心而堅固。大悲之念,斯謂至乎!朕祇嗣慶基,顧慚涼德,常遵先訓,庶 。因覽斯經,每懷欽奉。冀流通而有益,仍俾鏤於方板。所期貽厥庶邦,凡在

群倫, 勉同歸向云爾!





# 佛說四十二章經解

明古吳蕅益釋智旭著

經題七字,通別合舉,人法雙彰。「經」之一字是通名,一切大小乘脩多羅藏,同

名經故。「佛說四十二章」六字是別名,異衆經故。

就別名中 ,「佛」爲能說之人,「四十二章」爲所說之法。

覺他不同二乘,覺滿不同菩薩。即是釋迦牟尼如來,萬德慈尊,娑婆世界之敎主 「佛」者,梵語具云佛陀,此翻覺者,謂自覺、覺他、覺行圓滿。自覺不同凡夫,

也。

「說」者,悅所懷也。佛以度生爲懷,機緣未至,默然待時;機緣旣熟,應病與藥

也。

「四十二章」者,約數標名。蓋從一代時敎之中,摘其最切要、最簡明者,集爲一

册,以逗此土機宜,所以文略義廣,該通四教,未可輒判作小乘也。

## 後漢迦葉摩騰、竺法蘭同譯

後漢,即東漢,對前漢而言之。

傅毅對曰:「臣聞西域有神,號之爲佛。陛下所夢,其必是乎!」博士王遵亦奏 聲教流被此土。王命刻石爲記,埋之南郊。後於周穆王時,乾坤震動,有白虹十二 光貫太微。太史蘇由卜之,得乾之九五,飛龍在天,是西方大聖人也;後一千年, 曰:「按周書異記,載佛誕於周昭王二十六年甲寅。時江河泛溢,大地皆動,五色 孝明皇帝永平三年,歲次庚申,帝夢金人,項有日光,飛來殿庭。以問群臣,太史

法 明帝乃於七年歲次甲子,勑郎中蔡愔、中郎將秦景、博士王遵等一十八人,西尋佛 。至印度國 ,請迦葉摩騰及竺法蘭,用白馬馱經,幷將舍利,及畫佛像。以永平

道,貫日經天。太史扈多占之,謂是西方大聖人入滅之象。 」

,歲次丁卯,至洛陽。帝悅,造白馬寺,譯四十二章經

至十四年正月一日,五岳道士褚善信等,負情不悅,表請較試。乃於十五日,大集

繞壇涕泣,啓請天尊,詞情懇切,以旃檀柴等燒經,冀經無損。並爲灰燼。先時升 白馬寺南門,信等以靈寶諸經置道東壇上,帝以經像舍利置道西七寶行殿上。信等

天 、入火、履水、隱形等術,皆不復驗。而佛舍利 ,光明五色直上空中, 旋環如

華,及奏衆樂。時衆咸喜,得未曾有。此即佛法入震旦之始也。 , 編覆大衆 ,映蔽日輪 。摩騰以神足通,於虛空中飛行坐臥 ,神化自在 。天雨寶

按迦葉摩騰及竺法蘭,皆中印度人,二名俱不見有翻 0

所云譯者,謂以華言易彼梵語,令此方之人得解義也。

鹿野苑中, 世尊成道已 轉四諦法輪,度憍陳如等五人而證道果。復有比丘所説諸疑 ,作是思惟:離欲寂靜,是最爲勝。住大禪定 ,降諸魔道。於

求佛進止。世尊教勑,一一開悟。合掌敬諾,而順尊勑。

所謂 諸經通序 :如是我聞 ,皆有六種證信:一 ,一時佛在某處等 法體,二能聞,三機感,四教主,五處所,六同聞 。今文次第 ,與通途稍異。蓋繇佛法初來 八,且順

此方文字之體貴在簡略。然細繹之,六義俱備:

所 世尊」二字,即標教主。「成道已」三字,即標機感。「鹿野苑中」,即標處 憍陳如等」及「復有比丘」,即標能聞及餘同聞。「法輪」、「教勑 , 即

標法體。

惟」至「降諸魔道」,乃追叙成道之法。三從「於鹿野苑」至「證道果」三句,乃 別叙法輪之始。四從「復有比丘」至順尊勑,乃正叙此經發起也。 就此一文,仍分四節:初「世尊成道已」一句,乃總叙一化之繇。次從「作是思

初文,「世尊」者,即我釋迦牟尼如來。乃天中之天、聖中之聖,於一切器世間 切衆生世間 、一切正覺世間,獨稱尊也。

度迦 目顧四方,周行七步。自言:天上天下,惟吾獨尊。次復示爲童子,徧學衆藝,無 所明。今爲此土有緣衆生,故於過去人壽二萬歲時,迦葉佛會,示居補處位中。上 生兜率內院 成道」者,若論世尊,實成佛道以來,已經不可說微塵數劫,如法華經壽量品中 維衛國。父名淨飯 ,以淨天眼 ,觀可化機。直至人壽百歲時 ,母名摩耶 。處胎 十月,從左脇生。一手指天,一手指 ,機緣方熟,迺示 降神於中印 地,

不超倫 。至年二十九歲,遊城四門,覩老病死及沙門相,決志出家。子夜踰城,金

久得證 刀剃髮 , 0 盡棄珍飾,披樹神所獻麻衣,遊學諸國。先從阿藍迦藍習無所有處定 知非究竟 ,捨之而去。 次從鬱頭藍子習非想非非想處定,亦不久得證 。知 ,不

將欲度之,遂往雪山,示修六年苦行。每日止食一麻一麥,皮骨連立,終不成道

非究竟

,捨之而去

。見諸外道,競修苦行

,希冀得道,各以三年爲期

,終無剋獲

0

昧 釋化 ,降伏 現童 魔軍 子所施吉祥草, 。受牧女十六轉乳糜之供,精氣充足。次往熙連河中,浴身而出。取天帝 ,深入四禪 ,觀察四諦。 詣摩竭提國金剛場菩提樹下 於臘月初八夜,明星出時,豁然大悟,證無 5 敷草結跏趺坐。 以慈心三

漏道

,是爲佛寶初現世間也。

勝 四禪中,頓發三明,破魔王之愛網,斷外道之見縛也。或初成道句,是根本智 次文,「作是思惟」等者,乃追叙坐樹下時,以無師智、自然智,了知離欲寂靜爲 0 故 先訶棄欲界惡不善法 ;次又離喜而證妙樂 ,入於三禪 ,與覺觀俱 , ;次又雙棄苦樂,捨念淸淨 而入初禪;次復離於覺觀 , , 入第 內淨 四 心 禪 ,自 0 從 而

證菩提。次「作是思惟」等,是後得智,重觀四諦以爲說法之本。寂靜最勝,即觀

滅諦;住大禪定,即觀道諦;諸魔外道,即苦集二諦也。

第三文中,「鹿野苑」者,亦名鹿園,在波羅奈國,即佛初轉法輪之處。

轉四諦法輪」者:苦集滅道名四諦。

苦是世間之果,即指三界六道色心五蘊。

集是世間之因 ,即指見思煩惱,及有漏善惡不動等業。

滅是出世之果,謂因滅故果滅,便得寂靜無爲安樂。

道是出世之因,謂略則戒定慧,廣則三十七品,所謂四念處、四正勤、四如意足、

五根、五力、七覺支、八正道也。

此四皆名「諦」者,審實不虛故。復名「四聖諦」者,惟有聖智乃證知故。

佛旣證見此四諦理,轉令一切衆生咸使聞知。從佛後得智中,流出法音,度入衆生

心中,故名爲輪。又輪者,摧碾之義。以此敎法,轉破衆生見思諸惑,故名爲輪

說此四諦法輪,凡有三轉:

者,示轉。謂此是苦,逼迫性;此是集,招感性;此是滅,可證性;此是道,可

修性。

應修

勸轉 。謂此是苦,汝應知;此是集,汝應斷;此是滅 ,汝應證;此是道 ,汝

證轉。謂此是苦,我已知;此是集,我已斷;此是滅,我已證;此是道,我

上修。

是爲法寶初現世間也。

敢歸 母舅 之。初轉法輪,陳如先悟。次說布施持戒生天之法,訶欲不淨,讚歎出離爲樂 男 憍陳如等五人者:一阿濕婆,此翻馬勝。二跋提,此翻小賢。三拘利,或名摩訶 人樂苦行者亦復捨去,於鹿苑中各修異道。佛旣成道,觀此五人應先得度,遂往就 ?。此三人皆佛父黨。四憍陳如,此翻火器。五十力迦葉,或名婆敷。此二人皆佛 或 。初太子踰城出家,父王思念不置,命此五人尋之。太子旣誓不肯歸 ,遂相侍從。太子旣修苦行,二人不堪苦行者先自遁去;太子後受美食 , 五 河 人不

濕跋提尋悟。第三說法,迦葉拘利亦悟。是爲僧寶初現世間也。

葉等一千人,舍利弗、目犍連等二百人。從是以後,度人無量,咸令成比丘性 第四文中,「復有比丘」等者:佛旣度此五比丘已,次復度耶舍等五十五人,三迦

果上之饑饉也。又含三義:一破惡,二乞士,三怖魔 0

言「比丘」者,

此翻除饉。謂其具持二百五十淨戒,堪爲人世福田,除彼衆生因中

所說諸疑 ,求佛進止」,猶言決擇可否也。「合掌」表於一心聽法,不惰不散

已上序分,下皆正說。

陀含 動天地。次爲阿那含。阿那含者,壽終靈神上十九天,證阿羅漢 止清淨,爲四真道行,成阿羅漢。阿羅漢者,能飛行變化,曠劫壽命,住 佛言:辭親出家 0 便證阿羅漢 斯陀含者 ,識心達本 , 0 上一 愛欲斷者 還 ,即得阿羅漢 ,解無爲法,名曰沙門。常行二百五十戒 7 如四肢斷,不復用之。 0 次爲須陀洹。須陀洹者,七死 。次爲斯 進

此第一章,總明沙門果證之差別也。

欲證沙門四果,必須「辭親出家,識心達本,解無爲法」。

蓋父母不許,則佛法中不聽出家。出家而不識心達本,則身雖離俗,仍縛有爲,不

得名爲沙門。

識心」者,了知心外無法,即悟徧計本空。「達本」者,了知心性無實,即悟依

他如幻。

「解無爲法」者,了知眞如與一切法不一不異,即證圓成實性。

即增上戒學。「進止淸淨」,即增上心學。「爲四眞道行」,即增上慧學,謂觀察 沙門」,此翻勤息,謂勤修戒定慧,息滅貪瞋癡也。「常行二百五十戒」,

四諦而修道行也。

身 盡三界見思二惑。「飛行變化」,聊舉六神通之一事。「曠劫壽命」,謂三種意生 阿羅漢」,具含三義:一殺賊,二應供,三不生。乃沙門所證第四無學之果,斷 堪能隨願久住。「住動天地」,言羅漢所住之處,天神地祇皆爲感動 ;或可一

行一住,皆能震動天地也。

佛説四十二章經解

十,則超過下十九天。繇彼已斷欲界九品思惑,即於五淨居天中證阿羅漢,不復還 阿那含」,此云不還,即第三果。「十九天」者,從四王天,上至無煩,爲第二

斯陀含」,此云一來,即第二果。已斷欲界六品思惑,餘三品在。故一上欲天

一還人中,即證阿羅漢也。

來欲界也

漢果。此約任運斷者;若加行斷,則復不定。 惑,共潤一生;下上品、下中品、下下品惑,共潤一生。七番生死之後,方證阿羅 品惑,能潤一生;上下品惑,亦潤一生;中上品惑,亦潤一生;中中品、中下品 欲界九品思惑全在,故能更潤七生。謂欲界上上品任運貪瞋癡慢,能潤二生;上中 「須陀洹」,此云預流,即是初果。已斷三界見惑,初預聖流,不復墮三惡道。但

然三界見思,雖有多品多類,總以愛欲爲本。愛欲一斷,便出苦輪。故喻如四肢一

佛言:出家沙門者,斷欲去愛,識自心源,達佛深理,悟無爲法。內無所 斷 決不復用也

得 ,外無所求。心不繫道,亦不結業。無念無作,非修非證。不歷諸位 ,

而自崇最。名之爲道。

此第二章,明沙門果證雖有差別,而所證之理無差別也。

斷凡聖同居欲愛,識自心源我執本空,達佛真諦深理,悟生空所顯真如無爲之法

斷方便有餘欲愛,識自心源法執本空,達佛俗諦深理 ,悟法空所顯真如無爲之法 0

斷實報無障礙欲愛,識自心源俱空不生,達佛中諦深理,悟俱空所顯真如無爲之

法。

又了知三土欲愛即空,名斷欲去愛,識自心源徧計本虛,達佛眞諦深理,一 空一切

空, 無假無中而不空,悟如來藏如實空義,名無爲法 0

了知三土欲愛即假, 名斷欲去愛,識自心源依他如幻 ,達佛俗諦深理 假 切

假 。無空無中而不假,悟如來藏如實不空義,名無爲法 0

中 了 知三土欲愛即中,名斷欲去愛,識自心源圓成本具,達佛中諦深理,一中一切 無空無假而不中,悟如來藏離即離非、是即非即義 ,名無爲法。

佛説四十二章經解

此無爲法 ,本自有之,非屬新生,故「內無所得」。惟一眞心,心外無法,故「外

無所求」。

知法如筏,故「心不繫道」。已斷惑種,故「亦不結業」。

證無分別根本實智,故「無念」。證不思議後得權智,故「 無作 0

稱性之修 ,修即無修,故「非修」。全性作證,證無別證,故「非證」。

諸位如丈尺顯虛空,而虛空元非丈尺;又如入海雖辨淺深,而淺深無非大海,故云

「不歷諸位,而自崇最,名之爲道」也。

別教則中道隨緣不變,故中道不歷諸位。圓教則一色一香無非中道,故中道不歷諸 藏教則因滅會真,滅非真諦,故真諦不歷諸位。通教即事全真,故真諦不歷諸位

位。

繇上一章,方知性不廢修;繇今一章,方知修不礙性。

繇上一章,方知即而常六;繇今一章,方知六而常即

四教皆論性修,皆論六即。通此旨者,則於一代時教,思過半矣!

佛言:剃除鬚髮而爲沙門,受道法者,去世資財,乞求取足。日中

,

樹下一宿,慎勿再矣!使人愚蔽者,愛與欲也。

此第三章,讚歎頭陀勝行,以爲證道要術也。

上文旣云非修非證,恐人錯會,執性廢修,故今特申抖擻塵勞之行,以爲斷欲去愛

之方。譬如古鏡,雖復本具光明,理須磨拭 ,方得瑩淨耳!

佛言:衆生以十事爲善,亦以十事爲惡。何等爲十?身三、口四、意三。

身三者,殺盜婬。口四者,兩舌、惡口、妄言、綺語。意三者,嫉恚癡。

如是十事,不順聖道,名十惡行 。是惡若止,名十善行耳。

此第四章 ,明善惡無性,猶如反掌;而生死湼槃,惟此三業,更非他物也。

斷他物命,名之爲殺。不與而取,名之爲盜。兩相交會,名之爲婬。

鬭亂彼此,名爲兩舌。呪咀罵詈,名爲惡口。心口相違,名爲妄言。無義浮辭

爲綺語。

慳鄙貪欲,不耐他榮,名之爲嫉。暴戾殘忍,懷恨結怒,名之爲恚。於諸事理盲無

因,俗諦善爲菩薩因,中諦善爲佛乘因。此三理善,俱名上上品十善。以行事善 所曉,名之爲癡。身口七支,惟是業道;意地三支,屬煩惱道。繇惑造業,必招苦 善爲脩羅因 即便成水也。然惡旣有事惡理惡,故翻惡爲善,亦有事善理善。就事善中,下品十 果 ,長繫三界,故「不順聖道」。是惡若止,即名十善。譬如破闇即是光明 , 中品十善爲人道因 ,上品十善爲天道因。就理善中 ,真諦善爲二乘 ,泮冰

廣 佛言:人有衆過,而不自悔、頓息其心,罪來赴身;如水歸海 。若人有過,自解知非,改惡行善,罪自消滅;如病得汗,漸有痊損 ,漸成深

者,未必能達理善;而行理善者,必兼圓滿事善故也。

此第五章,承上止惡行善之意,而勸勉改過遷善也。

耳

有過不悔 ,則如水赴海,日深日廣 ;知過必改, 則如病發汗 客邪自除

佛言:惡人聞善, 故來擾亂者,汝自禁息 ,當無瞋責 ,彼來惡者而自惡

之。

此第六章,申明善能勝惡,而惡不能破善也。

瞋責惡人。以惡乃在彼,於我無涉故也。如明鏡中現於醜容,彼容自醜,鏡何醜 上文勸人止惡行善,改過遷善,恐有愚者,畏彼惡人撓亂,遂不敢行,故誡以愼勿

哉?倘一生瞋責,則反攬彼之惡,成我之惡矣!

納,子自持禍歸子身矣!猶響應聲,影之隨形,終無免離,慎勿爲惡。 以禮從人,其人不納,禮歸子乎?對曰:歸矣!佛言:今子罵我,我今不 佛言:有人聞吾守道,行大仁慈,故致罵佛。佛默不對。罵止,問曰:子

此第七章,即上章「彼來惡者而自惡之」之明證也。

今人聞罵,鮮不發瞋,大似領謝帖子,正中罵者之計耳!思之思之。

患。今誡以愼勿爲惡,即是除其禍源。慈悲甚矣! 或問:佛旣大慈,何不令罵者無禍耶?答曰:佛豈欲令其得禍,無奈彼人自招禍

至彼,還坌己身。賢不可毁,禍必滅己。 佛言:惡人害賢者,猶仰天而唾,唾不至天,還從己墮;逆風揚塵,塵不

此第八章,深誡惡人令勿害賢,而兼以勖賢人也。

人若果賢 ,則如天亦如上風,豈受唾塵。倘可受毀,便非賢矣!

佛言:博聞愛道,道必難會;守志奉道,其道甚大

博聞者,不如隨文入觀,惟圖強記名言也。愛道者,不知道本即心,妄於心外取道 此第九章,誡勸稟教行人,須聞而思,思而修,不宜但貴口耳之學也。

也

如一炬之火,數千百人各以炬來分取,熟食除冥,此炬如故;福亦如之。 佛言:覩人施道,助之歡喜,得福甚大。沙門問曰:此福盡乎?佛言:譬 守志者,念念趨向菩提,不雜名利心也。奉道者,念念體會心源,不復向外覓也。

施 施道有三:一資生施,謂以財濟其貧窮 ,謂以三學令得四益。不惟自行三種施道,得福甚多,即使見他行施,助令歡 。二無畏施,謂於難中拔其憂苦。 三者法

此第十章,明隨喜功德,自他兼利,福無窮盡也

喜,福亦無盡。

曉之。 供佛。 人,與少不若與衆,世出世道,無不皆然也。「熟食」,喻成聖果。「除冥」,喻 沙門」下,釋疑。恐有愚人正行施時,見他隨喜,懼他分我功德,故以炬火如故 蓋不惟無減於我,而福報展轉殊勝矣!昔有二人採花,一自供佛 以問彌勒,彌勒曰:自供者成辟支佛果,施人者成無上菩提 。蓋獨樂不若與 , 轉施

破三障

不如飯 者萬 佛言 不如飯 含,不如飯一阿那含;飯一億阿那含,不如飯一阿羅漢;飯十億阿羅漢 : 飯惡人百,不如飯一善人;飯善人千,不如飯一持五戒者 ,不如飯一須陀洹;飯百萬須陀洹,不如飯一斯陀含;飯千萬斯陀 一辟支佛;飯百億辟支佛 無念無住無修無證之者 0 ,不如飯一三世諸佛;飯千億三世諸佛 ;飯五戒

此第十一章,較量福田勝劣不等,令人知所歸向也。

醫之法,不以三歸爲體,不成出世津梁;若能受三自歸,奉持五戒,爲佛弟子,便 善勝百惡人,顯易可知。一持五戒人勝千善人者;以世間善人所奉十善,僅屬舊

知四諦四念處門,於一生中堪證三果,故得千倍勝於常流也。

須陀洹勝萬五戒者:須陀洹已斷見惑,已預聖流,故得遠勝內外凡也。

陀洹,未修勝進行時,終不能知二果境界,何況能到耶! 斯陀含勝百萬須陀洹者:斯陀含已斷欲界六品思惑,煩惱漸薄,正使百萬住果須

阿那含勝千萬斯陀含者:阿那含已斷欲界思惑,九品皆盡,正使千萬斯陀含,終

不能知三果境界,況能到耶!

能知能到故也

一阿羅漢勝一億阿那含者:萬萬曰億。阿羅漢斷盡見思,超出三界,尤非住三果人

世,觀物幻化,自悟無生,斷結侵習,名爲獨覺。以阿羅漢但斷正使,辟支佛兼侵 辟支佛有二種:一者出有佛世,稟十二因緣敎,悟道侵習,名爲緣覺。二者出無佛

餘習,故一辟支,能勝十億阿羅漢也。

量衆生,故一佛能勝百億辟支佛也。 「三世諸佛」 ,約藏頭佛果言之。三大阿僧祇劫修行六度,正習皆悉斷盡,利益無

餓狗 妙理 成佛時 福勝劣差別,則無以顯修德之足貴;若不達生佛本自平等,則無以悟性德之淵源 本無住、修本無修、證本無證,故於平等法中分勝分劣;若了達無念無住無修無證 復次,前之八番,皆是約田;此第九番,即是約心。蓋未達一切諸法念本無念、住 通教體色入空,知一切法無性,故念即無念、住即無住、修即無修 分證法身,皆能示現百界作佛 無念無住無修無證之者」,指圓敎初住已上,亦可兼攝別敎初地、通敎佛地。蓋 , 則下自惡人、上至諸佛,罔非無念無住無修無證之者。所以人上佛飯 功德無異 , 能於色究竟天示現最高大身,統王三千世界 ;維摩以一分奉難勝如來,一分施一最下乞人,福亦平等。若不知 、八相成道,所以供此 一人,勝於千億三世諸佛也 。別歡喜地,圓發心 、證即 無證 住,皆已 , 佛 至 施

觸 難 佛言:人有二十難。貧窮布施難,豪貴學道難,棄命必死難 事無心難,廣學博究難,除滅我慢難,不輕未學難,心行平等難,不説 ,生值佛世難 ,忍色忍欲難 ,見好不求難 , 被辱不瞋難 , 有 勢不 ,得覩佛經 ·臨難 ,

是謂常同常別,常別常同,法界法爾,微妙法門。

# 是非難,會善知識難,見性學道難,隨化度人難,覩境不動難,善解方便

難。

此第十二章,略舉二十難事以爲勸誡也。

順情則易,逆情則難。然能深發肯心,則雖難而易;其或但隨流俗,則雖易亦難 0

夫貧窮則布施爲難,故雖少許之施,得福甚多,不可不勉力也。然現見有貧而能施

者,乃富人反不肯施,則慳鄙爲何如耶?豪貴學道,例施可知。

人所最重者身命,誠能棄命,則何事不可爲者?然未聞保命畏死之人,果能長生不

**死**,則亦何事貪惜耶?

佛經難覩,今幸覩佛經而不研精殫思,則與不覩何異?

佛世難値 ,今幸值佛世而不及時進修 ,則與不值何殊?

色欲雖恆情所好 ,然或察其味少苦多,或觀其如幻如影 ,則亦何難忍制?

視富貴若草頭露,何容以勢臨人?觀事境同夢所緣,何必勞心措置? 若見好時,知其未必可求,則貪心自息;若被辱時,但以情恕理遣,則瞋意自平。

廣學而不博究,如入海無指南針,安能會理?恃學而生我慢,如沃壤以滋稊稗,反

害良禾。

佛嘗言四種不可忽:一者火雖小不可忽,二者龍雖小不可忽,三者王子雖小不可

忽,四者沙門雖小不可忽。今有輕未學者,未知其不可忽故也

心平等,則施難勝如來與施最下乞人功德無異;泯是非,則一切諸法無非佛法

是非情見未忘,決不能見法界眞善知識。不見現前一念心之實性,決不可以學無上

道

0

不學稱性權實之道,不能隨化度人。未達隨化度人方便,安能覩十法界境而一心不

若不能於一一法界中具見一切法界事理,何繇善解同體方便? 故知此二十事 ,後後難於前前也

道。譬如磨鏡,垢去明存;斷欲無求,當得宿命。 沙 門問佛 以 何因緣 ,得 知宿命 ,會其至道?佛言:淨心守志,可會至

佛説四十二章經解

六二

此第十三章,問意重在宿命,答意重在會道。

沙門問佛:何者爲善?何者最大?佛言:行道守真者善,志與道合者大。 蓋知宿命者,未必會至道;而會至道者,決能知宿命也。

行道守真,則萬善同會。志與道合,則法界體圓。

此第十四章,明善莫善於眞修,大莫大於實證也。

明矣! 逮於今日;十方所有,無有不見,無有不知,無有不聞。得一切智,可謂 健。忍者無惡,必爲人尊。心垢滅盡,淨無瑕穢,是爲最明。未有天地, 沙門問佛:何者多力?何者最明?佛言:忍辱多力,不懷惡故,兼加安

此第十五章,明忍辱力大,滅垢明遠也。

忍有三種:一耐怨害忍,亦名生忍。二安受苦忍,亦名法忍。三諦察法忍,亦名第

義忍。今即約耐怨害而入第一義也。餘文易知

佛言:人懷愛欲,不見道者,譬如澄水,致手攪之,衆人共臨,無有覩其

影者 。人以愛欲交錯,心中濁興,故不見道。汝等沙門,當捨愛欲。愛欲

**垢盡,道可見矣!** 

界影像也。

此第十六章,明吾人心水本澄,即是至道;但繇愛欲所攪,故不能於一念中炳現十

捨三界愛欲 ,見思垢盡,則眞諦道可見。捨偏眞愛欲,塵沙垢盡,則俗諦道可見

捨果報愛欲,無明垢盡,則中諦道可見矣!

佛言:夫見道者,譬如持炬,入冥室中,其冥即滅,而明獨存;學道見

諦,無明即滅,而明常存矣!

此第十七章,深顯無明無性,故見道即可永滅;亦顯無明未滅,不得名眞見道也 知無明之可滅,不致生於退屈。知真見之常明,亦可袪增上慢矣。

佛言:吾法念無念念、行無行行、言無言言、修無修修,會者近爾,迷者

遠乎!言語道斷,非物所拘,差之毫釐,失之須臾。

此第十八章,明念行言修,皆超有無兩關,而不可以有無情見湊泊也。

念即無念,故常念此無念之念,豈以不念爲無念哉!「行」等三句,例此可知。

會得則觸事全真,迷者則轉趨轉遠。

言語相即解脫相,故言語道斷。一切物即真如性,故非物所拘

才涉有無 ,便隔霄壤,故差之毫釐。才涉思惟,便成剩法,故失之須臾。

佛言:觀天地,念非常。觀世界,念非常。觀靈覺,即菩提。如是知識

#### 得道疾矣!

此第十九章,明唯心識觀,遣虛存實也。

常,豈是心外實法?次觀一身之中,世爲遷流,界爲方位,世固念念不停,界亦互 天覆地載,凡情計爲常住實有。今觀天則寒暑代謝,地則陵谷遞遷,旣爾生滅非

對無定,於中豈有實我實法?此則遣徧計之本虛也。

次觀現前一念靈覺之性,即離我法二執,便成四智菩提,此則存依圓之實性也。

佛言:當念身中四大,各自有名,都無我者。我既都無,其如幻耳! 遣虚 則無增益謗 ,存實則無損減謗, 非有非無,速契中道矣!

此第二十章,示人以四大觀身,而入如幻法門也。

身中堅者名地,潤者名水,煖者名火,動者名風,覓我了不可得。

能成所成,體皆如幻;能觀所觀,亦復如幻。於一幻喻,便可通達空假中

理。

故知 四大觀身,實四教之總户也。

枉功勞形。譬如燒香,雖人聞香,香之燼矣!危身之火,而在其後。 佛言:人隨情欲,求於聲名;聲名顯著,身已故矣!貪世常名而不學道,

此第二十一章,甚明好名之人,不惟無益,而且深有損也。

佛言:財色於人,人之不捨。譬如刀刃有密,不足一餐之美;小兒舐之,

則有割舌之患。

此第二十二章,甚明財色之味寡而傷害甚多,有智者不可類彼小兒也。

情愛於色,豈憚驅馳!雖有虎口之患,心存甘伏,投泥自溺,故曰凡夫。 佛言:人繫於妻子舍宅,甚於牢獄。牢獄有散釋之期,妻子無遠離之念 0

# 透得此門,出塵羅漢。

此第二十三章,深明妻子舍宅之埋沒人,而勸以速遠離也。

欲界以男女眷屬爲妻子,種種宮殿爲舍宅。色界以味禪爲妻子,四禪天爲舍宅。無

色界以癡定爲妻子,四空天爲舍宅。愛見所噬,患同虎口。

充類言之,二乘以一解脫味爲妻子,偏眞湼槃爲舍宅。權敎以遊戲神通爲妻子,出

真涉俗爲舍宅。透得空有兩門,方成中道無生之果。

佛言:愛欲莫甚於色。色之爲欲,其大無外,賴有一矣。若使二同,普天

之人,無能爲道者矣。

此第二十四章,深明色欲爲衆生重病也。佛頂經云:婬心不除,塵不可出。

佛言:愛欲之人,猶如執炬逆風而行,必有燒手之患。

此第二十五章,甚明愛欲之不可習近也。

逆風把炬,未有不燒手者;習近愛欲,安得不損淨法身、害方便手耶?

天神獻玉女於佛,欲壞佛意。佛言:革囊衆穢,爾來何爲?去!吾不用。

天神愈敬,因問道意。佛爲解説,即得須陀洹果。

此第二十六章,明佛不被魔嬈,遂能化魔也。

天神即魔王波旬, 佛初成道時,先興甲兵,不能害佛,次獻三女,又不能嬈佛

歸佛化而證初果。

人能觀彼女人爲革囊衆穢,則婬意得除,自他俱利矣。

所遮,不爲洄流所住,亦不腐敗,吾保此木決定入海。學道之人,不爲情 佛言:夫爲道者,猶木在水,尋流而行。不觸兩岸,不爲人取,不爲鬼神

此第二十七章,喻明學道須遠離諸障也。

欲所惑,不爲衆邪所嬈,精進無爲,吾保此人必得道矣。

兩岸以喻情欲,則有見思情欲、無明情欲。見思情欲耽染生死,如觸此岸;無明情

欲耽染湼槃,如觸彼岸。

人及鬼神,以喻衆邪。愛網所纏,如爲人取;見網所覆,如爲鬼神所遮。

洄流所住,正與精進相反;腐敗,正與無爲相反。蓋不能直心正念眞如,每欲進而

反退,如流急反洄;不達無爲法性,則著相所修福慧,終成腐敗。

故必不爲生死湼槃情欲所惑,不爲愛見衆邪所嬈,正念眞如而精進,了達法性本無

爲,斯得道可保矣!

佛言:慎勿信汝意,汝意不可信。慎勿與色會,色會即禍生。得阿羅漢

已,乃可信汝意。

此第二十八章,深誠意馬難調,而色禍宜避也。

衆生無始以來,祇因恣情率意,久受輪回。未證阿羅漢,常與無明愛見慢俱,豈可

自信汝意而不事推簡耶?

濁世,當如蓮華,不爲泥汙。想其老者如母,長者如姊,少者如妹,稚者 佛言:慎勿視女色,亦莫共言語。若與語者,正心思念:我爲沙門,處於

如子。仝度脱心,息滅惡念。

此第二十九章,申明遠女防過生善滅惡之方便也。

先以蓮華不染而自期待,則正念自利。復視如母如姊如妹如子而度脫之,則慈心利

他。

旣與二利相應,惡念自然息滅。

佛言:夫爲道者,如被乾草,火來須避。道人見欲,必當遠之。

此第三十章,申誠遠離諸欲,勿令爲欲火所燒害也。

佛言:有人患婬不止,欲自斷陰。佛謂之曰:若斷其陰,不如斷心。心如 六情根猶如乾草,六塵境喻若烈火,未到心境兩空,應修遠離勝行。

意,意以思想生,二心各寂靜 功曹,功曹若止,從者都息 。 邪心不止,斷陰何益? 佛爲説偈 ,非色亦非行。佛言:此偈是迦葉佛説 :欲生於汝

此第三十一章,申明斷欲須從心斷也。

耶?無因生耶?又此思想,爲在內耶?在外耶?在兩中間耶?爲在過去耶?現在 斷心之法:推此欲從意生,意復從思想生。只此思想,爲自生耶?他生耶?共生

耶?未來耶?

如是推時,思想寂靜。思想寂靜故,意即寂靜。意寂靜故,欲即寂靜。欲寂靜故

七0

觀一切色如鏡像等,即是非色;觀一切行如泡沫等,即是非行。

從上諸佛展轉傳受,不過傳此調心方便而已。

佛言:人從愛欲生憂,從憂生怖。若離於愛,何憂何怖?

此第三十二章,推憂怖之繇愛欲,而勸人斷欲去愛也。

衆生無始以來,妄認四大爲自身相,妄認六塵緣影爲自心相,執著貪戀不肯暫捨, 、種種恐怖。惟以四大觀身,知身無我;以四運觀心,知心無常。愛

欲旣斷,憂怖自除 0

遂生種種憂惱

退,或格鬭而死,或得勝而還。沙門學道,應當堅持其心,精進勇鋭,不 佛言:夫爲道者,譬如一人與萬人戰。挂鎧出門,意或怯弱,或半路而

畏前境 ,破滅衆魔,而得道果。

此第三十三章,喻明爲道之人,須具戒定慧也。

受持淨戒,譬如挂鎧。惟堅持其心,則無怯弱之意,此戒力也。精進勇銳,則無半 專精學道之心,譬如一人。無始虛妄諸惑習氣,譬如萬人。

路之退,此定力也。

不畏前境 則無格鬬致死,此慧力也。合此三力,破滅無始衆魔而證道果,是爲得

勝而還矣。

惱,行即退矣。其行既退,罪必加矣。但清淨安樂,道不失矣。 若調適,道可得矣。於道若暴,暴即身疲。其身若疲,意即生惱。意若生 爲何業?對曰:愛彈琴。佛言:弦緩如何?對曰:不鳴矣!弦急如何?對 沙門夜誦迦葉佛遺教經,其聲悲緊,思悔欲退。佛問之曰:汝昔在家,曾 日:聲絶矣!急緩得中如何**?**對日:諸音普矣!佛言:沙門學道亦然

此第三十四章,明學道之法,須善調身心,勿令緩急失所也。

佛言:如人鍛鐵,去滓成器,器即精好。學道之人,去心垢染,行即清淨 儒者亦云:其進銳者其退速。又云:勿忘勿助。蓋三乘出要類如此。

矣。

此第三十五章,喻明垢染不可不除也。

佛説四十二章經解

但除垢染,即成清淨。所謂但盡凡情,別無聖解;但有去翳法,別無與明法也

成佛作祖,豈於心外有法可得哉?不過淨除習氣而已。

具難 佛言:人離惡道,得爲人難。既得爲人,去女即男難。既得爲男,六根完 。六根既具,生中國難。既生中國,值佛世難 。既值佛世, 遇道者

難 0 既得遇道 ,興信心難。既興信心,發菩提心難。既發菩提心 ,無修無

證難。

此第三十六章,展轉明難得之事以深警人,令勿失良緣也。

不達無修無證,豈名真正發菩提心?不發真正菩提,豈名信心?不興信心,豈名遇

道?

旣不遇道,值佛何益?旣值猶不值,則中國猶之邊方。旣中國不異邊方,則六根具

猶不具。

旣六 根具猶不具 ,則男子亦非男子。旣男子不成男子 ,則人身何異惡道

靜言思之,可不發菩提心,急悟無修無證之要旨乎?

佛言:佛子離吾數千里,憶念吾戒,必得道果。在吾左右,雖常見吾,不

順吾戒,終不得道。

此第三十七章,深明心近則近,心遠則遠,而不以形跡論遠近也。金口誠言,重戒 若此,末世弟子,奈何弗思!

我不見彼;若有比丘,於海彼岸,能不放逸,精進不懈,斂攝諸根,雖去我遠,我 比丘已先見我。若比丘放逸懈怠,不攝諸根,雖共我一處,彼離我遠,彼雖見我 從何來?爲有伴否?」彼即以上事答。佛言:「癡人!汝不見我,謂得見我。彼死 夜先到佛所,禮足聞法,得法眼淨。飲水比丘,後日乃到佛所。佛知而故問: 「汝 佛。」答言:「我寧喪身,不毀佛戒。」遂便渴死。即生忉利天上,天身具足。是 言:「世尊制戒,不得飲蟲水故。」彼復勸言:「長老但飲,勿令渴死,不得見 井 僧祇律云:波羅脂國有二比丘,共伴來詣舍衛問訊世尊。中路渴乏無水。前到一 比丘汲水便飲;一比丘看水見蟲,不飲。飲水比丘問言:「汝何不飲?」答

常見彼,彼常近我。」

七四

人命在幾間?對曰:飯食間。佛言:子未知道。復問一沙門:人命在幾 佛問沙門:人命在幾間?對曰:數日間。佛言:子未知道。復問一沙門:

間?對曰:呼吸間。佛言:善哉,子知道矣!

此第三十八章,明人命無常,不可不知也。

祖白王曰:「彼惟惜此一身之死,遂於色聲無所見聞,何況沙門秉佛無常無我至 宮女音樂,徧處歌舞,試問罪人何所見聞。」王如其言。令一罪人手捧滿油,徧歷 隨後 保,況刹那刹那念念生滅,非沈思諦觀,豈能知之!昔西域有一國王,不信佛法, 曰:「我於爾時,唯恐一滴油墮,白刃加頸。故惟見手中之油,更無他見聞也 惱耶?」祖師曰:「王試取一獄中必死罪人,滿器盛油,令其手捧,用四屠人出刃 問祖師曰:「吾見外道種種苦行,尙不能折伏婬心,而今沙門四事如意,豈能斷煩 四衢女樂叢中。一滴不墮,因赦其罪。召而問之:「汝於四衢何所見聞?」罪人答 一期色心連持不斷,名爲命根,乃依本識種子假立,非有實法。出息雖存,入息難 。若能一滴不失,便赦其罪;若傾一滴,隨手斬之。同彼遊於四衢。王更盡出

,痛念無量劫數生死之苦,安得不斷煩惱!彼外道等,不知無常無我,徒事苦

行,故無益耳。 」王乃信服。

噫!誠知人命在呼吸間,何俟屠人執刀隨後,而心始無放逸哉!

佛言 ··學佛道者,佛所言説,皆應信順。譬如食蜜,中邊皆甜;吾經亦

此第三十九章,明佛經皆應信順,不應妄分大小頓漸,而生輕重心也。

爾。

佛之言教,不出權實,爲實施權 ,開權顯實。四教各有四門,門門各具四悉。今有

執小謗大,執大謗小,執事撥理,執理撥事者,皆違佛旨者也。

佛言:沙門行道,無如磨牛;身雖行道,心道不行。心道若行,何用行

道。

四十章,明行道在心不在形也。心不入道,徒事外儀,與磨牛何異哉!

佛言:夫爲道者,如牛負重。行深泥中,疲極不敢左右顧視;出離淤泥,

乃可蘇息。沙門當觀情欲,甚於淤泥。直心念道,可免苦矣。

此第四十一章,誡人直心念道,當以出離情欲爲期也。

槃, 聚 敝帛。視大千界,如一訶子。視阿耨池水,如塗足油。視方便門 佛言:吾視王侯之位,如過隙塵。視金玉之寶,如瓦礫。視紈素之服,如 0 如晝夕寤。視倒正,如六龍舞。視平等,如一真地。視興化 視無上乘 ,如夢金帛。視佛道,如眼前華。視禪定 ,如須彌柱。視湼 ,如四時 ,如化寶

木。

此第四十二章,結明佛眼等觀一切諸法,所以破衆生之法執也。

人間一百年,不過忉利天一晝夜;娑婆一大劫,不過極樂世界一晝夜。則王侯榮

貴,與過隙塵何異?

諸天器皿,純是七寶;極樂國地,黃金所成。彌勒成佛道時,此地亦皆瑠璃,況金

玉瓦礫等是四微所成,何足重哉?

服雖紈素不過蔽形,苟可遮羞,敝帛何害?

大千界亦是惟心,一訶子亦是惟心。觀相元妄,故於是中橫計大小。觀性元眞,變

大千之心非大非多,變訶子之心非小非少也。

阿耨池水與塗足油,例此可知。

方便門」者,諸佛所設三乘五乘七九諸方便也。衆生稟此法寶,剋果不虛。然在

諸佛 ,不過爲實施權,豈有實法?故但如化寶聚耳 !

無 上乘 ,雖云是最實事,然皆衆生性具之理,心外無法,故曰:圓滿菩提,歸無所

得。如夢中金帛,豈有實物可得哉?

也。一 種種佛道,爲對凡情;凡情不生,佛道何有?所謂「無爲無起滅,不實如空華 」

須彌出海 ,風浪不能漂動;禪定持心,境識不能遷惑 。然須彌無實法,不過四寶四

微合成;禪定亦無實法,不過諸心心所四分合成耳!

生死如長夜,無明所纏,故畫夕咸寐;湼槃如永日,智慧開朗,故畫夕咸寤也。

流轉生死 覺名爲正,而實無增。故但如六龍舞,不過首尾相換而已 ,惟是六根;安樂湼槃,亦惟六根。背覺合塵名爲倒 ,而實無減 ;背塵合

佛説四十二章經解

相法門,直是頭頭法法,無非大總相法門也 諸法旣皆平等,則隨舉一微塵法,即與一真如地平等。非離一切法外,別有一大總

榮,番番實,番番落。終而復始,始而復終,徧於十方,亘於三世,皆是如來自在 依一真地而施化道,如依大地而有四時之木。春生夏榮,秋實冬落,番番生,番番

# 佛説四十二章經解

神力也

佛滅度 加也。諸供養中,法供養最。法供養者,識自本心,了法空寂,念念佛出世,念念 者。」 摩不二之門,不越乎此矣!又言「飯千億三世諸佛,不如飯一無念無住無修無證之 結業,無念無作,非修非證,不歷諸位而自崇最,名之曰道。」金剛無住之旨,維 是經頓漸兼收。首唱「識心達本,解無爲法,名曰沙門。」又言「心不繫道,亦不 夫無念無住無修無證之者,所謂自性天眞佛也。三世諸佛覺此而已,非有所 ,是爲飯一無念無住無修無證之者,豈外求哉?此爲頓敎。其間羅舉四眞


道、十善行,訶斥欲染,策發淨業,警世非常,覺諸幻化,此爲漸敎。夫欲染不

之助 經言:「佛所言說,譬如食蜜,中邊皆甜。」學者於此盡心焉,則五部諸經,俱可 世之人,往往貪著有爲,不捨愛欲者,何也?由不知人命無常,世界幻化,以須臾 去,則淨行難成。淨行不成,則本明不發。故反復於斷愛去欲之修,以爲行道守眞 之樂,招長劫之殃。刃蜜炬風,其言絕痛,苟有丈夫之志者,其可不瞿然深省乎? ,而要歸於無我。了得無我,心垢自盡,常光現前,是則名爲解無爲法。然而

得門而入矣! 一行道人彭際淸書

## 你說四十二章經經





# 八大人覺經略解

明 後漢沙門安世高譯 **满益釋智旭解** 

大文爲三:初總標,二別明,三結歎。 今初

爲佛弟子,常於晝夜,至心誦念八大人覺。

者,明其文義淳熟,記憶不忘也。「八大人覺」,釋現結歎文中。 言「常於晝夜」者,明其功無間斷。言「至心」者,明其親切眞誠。言「誦念」 不論在家出家,但是歸依於佛,即爲佛之弟子。旣爲佛子,即應恆修此八種覺。

二别明即爲八。初無常無我覺。

第一覺悟:世間無常,國土危脆;四大苦空,五陰無我;生滅變異,虚僞 無主;心是惡源,形爲罪藪。如是觀察,漸離生死。

此入道之初門,破我法執之前陳也。

八大人覺經略解

次以四陰觀心。所謂受想行識,幷此色身,共名五陰。於中實無我及我所,但是生 次以四大觀身。地水火風互相陵害,故有四百四病之苦。各無實性故,究竟皆空。 先觀世間無常,國土危脆,如高岸爲谷,深谷爲陵等,則於依報無可貪著。 滅之法 ,刹那刹那遷變轉異。不實故虛,非真故僞,遞相乘代故無主。則於正報無

能如是觀察,則身心二執漸輕,即漸離生死之第一方便也。 衆惡之源;一迷四大爲自身相,則形便爲衆罪之藪。倘不直下覷破,害安有極。若 又此正報身心,不惟空愛惜之,於事無益,而且一迷六塵緣影爲自心相,則心便爲

可貪著

### 二常修少欲覺

# 第二覺知:多欲爲苦。生死疲勞,從貪欲起;少欲無爲 ,身心自在。

此旣以第一覺降伏見惑,次以第二覺降伏思惑也。

思惑雖多, 三知足守道覺 欲貪爲首。能修少欲,則可以悟無爲而得自在矣!

第三覺知:心無厭足,惟得多求,增長罪惡。菩薩不爾;常念知足,安貧

守道,惟慧是業。

此旣修少欲,復修知足,以專心於慧業也。

多欲不知足人,最能障慧。今於少欲之中,又復知足,則慧業任運可進矣!

四常行精進覺

第四覺知:懈怠墜落。常行精進,破煩惱惡,摧伏四魔,出陰界獄

夫所謂少欲知足者,正欲省其精力以辦出要耳!倘託言知足,而反坐在懈怠阬中,

則墜落不淺矣!

故必常行精進,以破見思煩惱。煩惱之魔旣破,則陰魔、天魔、死魔皆悉摧伏,而

五陰十八界獄乃可出也。

五多聞智慧覺

第五覺悟:愚癡生死。菩薩常念,廣學多聞,增長智慧,成就辯才,教化

一切,悉以大樂。

八大人覺經略解

雖云精進,若不廣學多聞,增長智慧,則成暗證之愆 0月別的朝鮮日食養.

又有聞無慧,如把火自燒;有慧無聞,如執刀自割。聞慧具足,方可自利利他。

六布施平等覺

第六覺知:貧苦多怨,横結惡緣。菩薩布施,等念怨親,不念舊惡,不憎

系ノベルで開生。人政県地球局の

雖有智慧而無福德,亦不可以自利利他,故須具行三檀也。

知貧苦之多怨,而行布施,即財施也。知怨親之平等,而不念不憎,即無畏施也。

法施已於上文明之。今以財及無畏,圓滿三檀耳。

七出家梵行覺

第七覺悟:五欲過患,雖爲俗人,不染世樂。常念三衣瓦鉢法器,志願出

家;守道清白,梵行高遠,慈悲一切。

雖修智慧福 德,若不永離居家五欲,終不可以紹隆僧寶,住持佛法。當知三世諸

佛,無有不示出家而成道者也。

三衣:一安陀會,二優多羅僧,三僧伽梨也。然使身雖出家,而不能守道清白,梵

行高遠,慈悲一切,則爲竊佛形儀,罪加一等,不可不知

八大心普濟覺

第八覺知:生死熾然,苦惱無量。發大乘心,普濟一切;願代衆生受無量

苦,令諸衆生畢竟大樂。

雖復出家,不發大乘普濟之心,則慈心不周;不發代衆生苦之心,則悲心不切

慈悲周切,方是紹佛家業之眞子也。

三結歎

生死苦,捨離五欲,修心聖道。若佛弟子誦此八事,於念念中,滅無量 船,至湼槃岸。復還生死,度脱衆生;以前八事,開導一切,令諸衆生覺 如此八事,乃是諸佛菩薩大人之所覺悟。精進行道,慈悲修慧;乘法身

「如此八事」下十六字,結成名義。

罪,進趣菩提,速登正覺,永斷生死,常住快樂。

八大人覺經略解

精進行道」下十六字,結成自覺功德。法身船,指所悟性德。 涅槃岸 ,指修德所

顯也。

三十二字,結成誦念功德。能誦其文,必能精思其義;能思其義,必能以此自覺覺 「復還生死」下三十二字,結成覺他功德。惟自覺,方能覺他也。「若佛弟子

他。故能滅罪而斷生死苦,趣覺而證常住樂也。

### 八大人覺經略解

局 盡 悉 著 見 聞 重 思 出 一 報 身 是 極 樂 國

蓮

因

寺大專

學

生齋

戒學會敬印

佛道教三經解

願

以

此

功

中華民國八十五年觀音菩薩成道紀念日

南投縣水里鄉頂崁村圳頭巷十五之一號



